

Na osnovu člana 16. stav (4). Zakona o Vladi Zeničko-dobojskog kantona („Službene novine Zeničko-dobojskog kantona“, broj 7/10), a u vezi sa članom 139. stav (1). Poslovnika Skupštine Zeničko-dobojskog kantona - Novi prečišćeni tekst („Službene novine Zeničko-dobojskog kantona“, broj: 7/12 i 12/13), razmatrajući Amandman II poslanika u Skupštini Zeničko-dobojskog kantona Amira Ganića na prijedlog Zakona o osnovnoj školi, na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona, na 133. sjednici, održanoj dana 22.02.2018. godine, d o n o s i

ZAKLJUČAK

I.

Vlada Zeničko-dobojskog kantona ne prihvata Amandman II poslanika u Skupštini Zeničko-dobojskog kantona Amira Ganića na Prijedlog Zakona o osnovnoj školi.

II.

Zaključak sa obrazloženjem u kome su sadržani razlozi zbog kojih se ne prihvata Amandman II upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/18.
Datum, 22.02.2018. godine
Z e n i c a

PREMIJER

Miralem Galijašević

DOSTAVLJENO:

1x Ministarstvo za obrazovanje,
nauku, kulturu i sport;
1x Stručna služba Vlade;
1x Stručna služba Skupštine;
1x a/a.

OBRAZLOŽENJE

I. PRAVNI OSNOV

Pravni osnov za donošenje Zaključka sadržan je u članu 16. stav 4. Zakona o Vladi Zeničko-dobojskog kantona („Službene novine Zeničko-dobojskog kantona“, broj 7/10) i članu 139. stav 1. Poslovnika Skupštine Zeničko-dobojskog kantona - Novi prečišćeni tekst („Službene novine Zeničko-dobojskog kantona“, broj: 7/12 i 12/13).

II. RAZLOZI ZA DONOŠENJE

Poslanik u Skupštini Zeničko-dobojskog kantona Amir Ganić podnio je Amandman II na Prijedlog Zakona o osnovnoj školi:

U članu 40. Prijedloga Zakona o osnovnoj školi, iza stava (3), dodaje se stav (4) koji glasi:

„Član 40.

(Udžbenici i nastavna sredstva u osnovnoj školi)

(4) Svi udžbenici koji se koriste tokom nastavnog procesa, a koje odobri resorno Ministarstvo, trebaju biti uniformni, odnosno jednoobrazni u pogledu imena autora i sadržaja udžbenika na nivou cijelog Kantona.“

Stoga se predlaže neprihvatanje Amandmana II iz razloga što se pojam udžbenika, radnog udžbenika i drugih nastavnih sredstava, uslovi i postupak njihovog odobravanja, prava i obaveze izdavača, te izbor udžbenika, radnih udžbenika i drugih nastavnih sredstava u osnovnim i srednjim školama, u kojima se primjenjuje nastavni plan i program Federacije BiH uređuje Odlukom o postupku pripremanja i odobravanja udžbenika, radnih udžbenika i drugih nastavnih sredstava za osnovne i srednje škole („Službene novine Federacije BiH“, broj 36/11). Procedura odobravanja udžbenika počinje zahtjevom za odobrenje udžbenika, radnih udžbenika i drugih nastavnih sredstava za osnovne škole koju podnosi izdavač Koordinaciji ministara obrazovanja i nauke u Federaciji BiH, putem Ministarstva. Na osnovu mišljenja i ocjena stručnog tima recenzenata o rukopisu udžbenika, radnih udžbenika i drugih nastavnih sredstava u skladu s Uputstvom za stručnu ocjenu rukopisa Koordinacija će donijeti rješenje o upotrebi udžbenika, radnih udžbenika i drugih nastavnih sredstava. Nakon službene objave Spiska odobrenih udžbenika, radnih udžbenika i drugih nastavnih sredstava Ministar Ministarstva za obrazovanje, nauku, kulturu i sport Zeničko-dobojskog kantona donosi Odluku o upotrebi udžbenika i nastavnih sredstava u tekućoj školskoj godini i zajedno sa spiskom odobrenih udžbenika, priručnika, radnih listova i zbirki zadataka za osnovne škole, gimnazije i srednje tehničke i stručne škole, uputi prema školama.